

## 09.03 MARELLA

### 80 onns Fundaziun Chesa Planta Samedan

La Chesa Planta è dapi 80 onns ina fundaziun d'util public cun la finamira da sustegnair e mantegnair la lingua e la cultura rumantscha. Il giubileum vegn festivà a partir dals 12 da zercladur 2023 cun in vast program d'anniversari.



La Chesa Planta è archiv, center cultural, chasa d'abitar e biblioteca. Ella è ina da las pli bellas chasas patrizianas en l'Engiadina e dominescha il Plazzet a Samedan. En las localitads dal vegl temp da baroc, sa chatta la substanza da construcziun originala e la mobiglia istorica, per part restaurada. Ellas èn museum, dentant era spazi per occurrenzas culturalas e curs da rumantsch. La Marella dà in sguard enavos en l'istorgia da l'edifizi imposant amez Samedan ch'è stretgamain collià cun l'istorgia da las famiglias Salis e von Planta. Ottavio Clavuot ch'ha manà plirs onns tras la chasa e lavurà là sco bibliotecari, mussa differentas stanzas e raquinta da la collecziun da manuscrits e cudeschs, ina da las pli preziasas e pli grondas collecziuns da tals documents en lingua rumantscha.



Chasper Pult porscha in'envista en la fundaziun, da la quala el è il president. D'udir èn er tuns da ses bab, Jon Pult ch'è stà l'emprim bibliotecari en Chesa Planta. Baldina Cantieni Kobi raquinta da las bombas, ch'aviuns americans han bittà giu sur Samedan durant la segunda guerra mundiala e ch'han squassà tras la vischnanca e donnegià era la Chesa Planta dal 1943. Oz 80 onns pli tard vegn la Chesa Planta a Samedan manada da Martina Shuler-Fluor. Ella è responsabla per il program da cultura e lingua. En occasiun dal giubileum ha ella preparà in vast program cun exposiziuns ed occurrenzas questa stad.

*Redacziun: Anna Caprez*